



Radiotelevisiun
Svizra Rumantscha

Commentari

Projects concrets, betg siemis

Gian Ramming, schefredactor RTR

Radio Rumantsch

Votaziun davart il credit per ils gieus olimpics 2026 en Grischun

12.02.2017

Daventai concrets, smettai da siemiar! Uschia ha il suveran respundì la dumonda da l'economia, da las partidas burgaisas e da la regenza da pudair elavurar ina candidatura per gieus olimpics.

60% n'han betg gì gust da dir gea ad ina idea pauc madira, ad in concept anc fitg turbel. 60% na sa fidavan betg da las empermischuns d'in svilup economic magnific en in avegnir anc lontan. E blers vegnan oz ad avair vuschà «na» perquai ch'els n'han betg propi chapì pertge ch'il «na» als gieus olimpics dal 2013 na vegn betg piglià serius e na duess oz gia betg pli valair.

L'economia, ils burgais e la regenza stuessan ussa declerar pertge lur recept per la guariziun dal chantun è vegnida valeteda co toxica e quai malgrà in sustegn massiv da la chasa da medias privata dal chantun. Ed els stuessan era dir, pertge che lur persvasiun da survegnir in «gea» ha gì ina basa uschè debla en la realitad.

Che la populaziun è absolut pronta d'investar en projects concrets a favur dal turissem ha ella mussà oz. Nua ch'igl è stà da vuschar davart projects concrets hai dà in cler «gea»: saja quai en la Val Müstair, saja quai a Scuol, saja quai a San Murezzan u saja quai a Claustra.

Ma en tut quests lieus hai era dà in cler na a l'elavuraziun d'ina candidatura per gieus olimpics.

Co ditg, il facit dad oz: daventer concrets e smetter da siemar.